

# PATENT OCHSNER

FINITOLAVORO – THE RIMINI FLASHDOWN, PART III<sup>2015</sup>

## PROLOG

[Huber]

summer 2015, hie chunnt dr dritt, dr letscht, dä teil, wo no fäut im mosaik für üsi fründe & verwandte, freaks, vögu & vagante. & no einisch für di, mi amor, mi querida, compañera de toda mi vida - us de ouge, aber nid us em sinn. ▷ das si nid songs, das isch en abschiedsbrief & nes röntgebiud. das isch e fläsche poscht & die schouklet wyt usse i de wäue vom ne ändlos tiefe, dunkublaue meer. das isch die auti gschicht vo däm aute chrueg, wo so lang zum brunne geit, bis är bricht. & das isch ds sauz vo de träne, ds vertröchnete bluet, däsche vor verbrönnte geduld, die dünni huut & ds dunkle härz. & kes schlächts wort über di. nix. nada. niente & rien du tout. nid eis schlächts wort über di! ▷ aber nüt vo au däm schaffts bis zu dir. du schteisch uf dr häue syte vo dr schtrass & d sunne schynt dir i dys gsicht & du blinzlisch & geisch wyter.

## SUNNY SIDE UP

[Huber, Manillio]

autag. aagriff. abwehr. abstreich. abstieg. abgang. abflug & absturz! ▷ du fingsch es hie & da u dert. du fingsch es so guet wie überau. aber hie bi mir im grüene fingsch es nümm. because I'm sunny side up. ▷ Manillio: do git me chliganove dr marterpfau, de strossefesch verbot, de fifabosse no d tagesschau, so si d hose seck vou trotz. wo dr autag dir di tagtraum stoppt. jeden e blaumaa zwüsche asphaltblocks, hei mir d stross, farb ide stifte und wort, kapuzestoff für chopf. dir lärmchlage, mir fährmanne, vokabular und humor. wei spotnachts tanze, wyt vom terror-glimmer, im jukebox-neon-schimmer. ▷ du fingsch es hie & da u dert. du fingsch es so guet wie überau. aber hie bi mir im grüene fingsch es nümm. because I'm sunny side up. ▷ autag. aagriff. abwehr. abstreich. abstieg. abbou. abbruch. abfuehr. ▷ abriss. aaschiss. abschied. abflug & absturz. ▷ du fingsch es hie & da u dert. du fingsch es so guet wie überall. aber hie bi mir im grüene fingsch es nümm. because I'm sunny side up.

## GALGENFELD

[Huber]

d eier ir pfanne, die mache jagd uf e schpäck, & die schöne, nöie hose hei grad scho wieder e fläck. & dr schosshund vom guafför, dä het irgendeis gschwür & d zeugen jehovas, die chlopfe au tag a my tür. im gaugefäud. im gaugefäud. bi mir im gaugefäud. ▷ die schöne damen us thailand, die schaffe ir nacht. sie hei wäge däm ds rote lämpli aagmacht. um ds huus schlyche d schtänze, scharf wie d sichle vom mond. & ou dr aut moser, wo no immer bi syne eutere wohnt. im gaugefäud. im gaugefäud. bi mir im gaugefäud. ▷ hie geit me frueh us em huus & chunnt schpät wieder hei. & di blauhaarige wittwe, die het offeni bei. & d täsche si läär & dr jackpot isch vou & im fernseh louft ging irgendwo e casting show. im gaugefäud. im gaugefäud. bi mir im gaugefäud. ▷ dr metzger het zuegmacht. & dr beck ou scho gly. wüu d chundschaft geit nöischtens lieber bim aldi verby. me frisst e döner am mittag & e döner zum znacht, o we dr choch im "abruzzese" früschi pasta het gmacht. im gaugefäud. im gaugefäud. bi mir im gaugefäud.

## GRILL

[Huber, Gmünder]

dene drei tag, wo me nid so guet cha schlittle, seit me summer & hüür preichts grad es wuchenänd. s bruucht numen es paar fläsche, e grill & nes kasettegrät, es paar lüt mit zwyfelhaftem ruf & närl tanzt dr bär. ▷ dr augemeinplatzhirsch, dä tanzet mit em fleischwouf, ds landei isch giggerig uf ds huehn. & ne chueh macht ds chaub & em metzger schöni ouge. uf em schoos vom bohneross niflet dr bock. & jede git, was är het, wüu kene vo au dene wett hüt z nacht allei i dsbett. ▷ en usdruckstänzer ringt mit sich & schindet ydruck. e haubschueh geit uf ds ganze & bändlet a. u d froue würde schöner & d manne würde schlanker mit jedem wytere schluck. & jede git, was är het, wüu kene vo au dene wett hüt z nacht allei i dsbett. ▷ was zum tüüfu isch ächt i der boole, dass plötzlech aui ufenang tue umetroole? wär het no nid? wär wett no mau & wär genau wett was? nid nume d chüeh hei gärn guets gras. ▷ I has weiss gott lieber e chly gsittet. sueche ds gschpräch, nid dr verchehr. me chas ja wirklech ou no angers zäme schön ha. das ungerscheidet üs vom veh. & ganz am schluss hei aui, was sie wei. allei, I wär im fau no frei!

## NACHLASS

[Huber]

für syni auti washburn gisch mir drei note. biuiger wär gschänkt. berchunnsch no ne satz nöii seite & das songbook vom bob dylan obedruuf. & däm tarot hie fähle zwo charte. I gloub, dr eremit & dr narr. nimm, was d chasch bruuche & mach drmit, was d wosch. & dr hiob hout dr räsch. nimm, was d chasch bruuche & mach drmit, was d wosch. & dr hiob hout dr räsch.

## EINE VO DENE

[Huber]

d böim trage schteine & dr herbscht faut i d schtadt. & är seit cool: zieh leine & I glouben ihms uf ds wort. & I suufe my schnaps uus & dr wind bricht mys glas & pfyft: hie chunnsch nümm druus & ne wulke flügtdür d schtrass. du bisch eine vo dene. du bisch eine vo dene da & du bisch eine vo dene dert.



# PATENT OCHSNER

FINITOLAVORO – THE RIMINI FLASHDOWN, PART III<sup>2015</sup>

## CALLBOY

[Huber]

plötzlech isch es sochtu gsi. & chly chäuter worde isch es o. & au farbe si verblasst, mir hei dr notusgang verpasst. mängisch geits haut eifach so. & I hätt villech söue kämpfe. hani aber nid. chly gwinne oder chly verlüüre, wo isch genau dr ungerschied? rüef mir, wed öppis vo mir wettsch! du weisch ja immer, woni bi u wasi tue. rüef mir, wed öppis vo mir wettsch! nume villech häbeni de myni ohre zue, grad i däm momänt. ▷ mir chönnte eifach fründe blybe, aber mir chöi das o ganz eifach la sy. i dere grosse wyte wäut, ungerem grosse himuszäut, chunnt me doch easy anenang verby. mir chönnte villech ewig kämpfe. mani aber nid. I zieh ne schtrich & gah wyter. das isch genau dr ungerschied. ▷ rüef mir, wed öppis vo mir wettsch! du weisch ja immer, woni bi u wasi tue. rüef mir, wed öppis vo mir wettsch! nume villech häbeni de myni ohre zue, grad i däm momänt.

## DA FÜR DI

[Huber]

I muess di la zieh, mys härz. I ha mi gförchtet vor däm tag. I hoffe, du gsehsch myni träne nid, wenn I da am fänschter stah. & die grossi, grossi lääri, die füut mi langsam uus. we nümm da isch, wos häreghört & we nümm so isch, wies emau isch gsi, we du rüefs & di niemer ghört: I bi immer da für di. I muss di la zieh, mys härz. I wünsch dr aues glück vor wäut. & ne guete ängu, wo ging zue dr luegt, wo di behuetet & beschützt. wüu hinger auem wunderschöne, da wartet mängisch scho dr schmärz. we nümm da isch, wos häreghört & we nümm so isch, wies emau isch gsi, we du rüefs & di niemer ghört: I bi immer da für di.

## SCHMIERFETT

[Huber]

d kapäue schpilt e miese salsa & d hüng schyssts richtig a & d jungs si breit & schpitz & göh z bode nadisna. sie hei dr wolf vom tanze & vom bier e dumme gring. & we d sitteschmier verbychunnt, de nähme sie dr bling. I gheie rückwärts us em fänschter mit schmierfett ir frisur, I bschisse ging im schpiu, verlüüre glych i eire tour, verrate jedes gheimnis & verschwyge dir dr räsch. verschüüch mi eifach nie meh us dyn näsch. ▷ mit pouke & trumpeté göh sie d metzgergass z dürab. sie schleipfe eine uf em bschüttwage zu sym grab. & d tulpe hei scho gschlampet, bevor sie se hei kouft. es chunnt & geit & schteit & gheit & louft haut so, wies louft. I gheie rückwärts us em fänschter mit schmierfett ir frisur, I bschisse ging im schpiu, verlüüre glych i eire tour, verrate jedes gheimnis & verschwyge dir dr räsch. verschüüch mi eifach nie meh us dyn näsch. ▷ e feissi färlimoore träit am schpiess über dr gluet. s paar houe sech uf d schnouze & us de nase tropfen ds bluet. sie rouke grüene, suufe rote us em tetrapak & sie gröhle & holeie & nes schlat se uf e sack. I gheie rückwärts us em fänschter mit schmierfett ir frisur, I bschisse ging im schpiu, verlüüre glych i eire tour, verrate jedes gheimnis & verschwyge dir dr räsch. verschüüch mi eifach nie meh us dyn näsch.

## D TAGE SI ZEUT

[Huber]

d tage si zeut & schlyche verby. sächs änlech & eine glych. wuche für wuche & jahr für jahr, d schtrass uuf & närr wieder z dürab. was gseit isch, isch gseit, & was gmacht isch, isch gmacht. & mängs hani schpeter beröt. ds wasser, das fliest vo de bärgen i ds meer. wes wieder chunnt, de si mir längscht nümm hie. I ha di geschter vermisst & I vermisste di hüt & morn wirts genau so sy. I ha di geschter vermisst & I vermisste di hüt & das geit nie meh verby. ▷ dr brunne isch gfrore, s ligt schnee uf dr schtrass. & so blybts villech no lang. dr fröhlig wird cho & närr wieder gah. wär weiss, villech merkt mes nid mau. I ha di geschter vermisst & I vermisste di hüt & morn wirts genau so sy. I ha di geschter vermisst & I vermisste di hüt & das geit nie meh verby.

## BIERIS

[Huber]

sie hei sech troffe, vor nes paarne jahr ir badi, hei zäme gredt & glachet & nes fröidi gha. beidi hei dänkt: di nimi hüt & morn la di. & übermorn chunnt öpper angers dra. sie hei sech küsst, wüll sie nümm hei möge lose. & sie hei sich i d arme gno. & beidi hei dänkt: hoffentlech geit das nid i d hose. aber sisch angers usecho. ▷ sie si nämlech irgendwie blybe hange. & drmit hei sie sich zfride gäh. ganz churz isch di liebi cho & nächär wieder gange. eh, wäm wett me das ou übel näh. sie hei zwar no gfuehl für enang, aber eifach nümm so richtig. eifach so gfuehl, wie se hüt fasch aui hei. sie dänke: dasch doch aues haub so wichtig. houptsach, me isch im winter nid allei.

## ROUBTIER

[Huber]

dir chuttets dr anke ab dr schnitte & ds tatoo vom ungerarm. & dyni loosche isch äng wie nes iglu. aber leider nume haub so warm. ▷ du schaffsch vom morge bis am aabe für chranki kasse und ne chlyni pangzion. es blybt no viu vom monet übrig, am bittere ändi vo dyn lohn. ▷ da isch scho lang, scho so lang dr worm drin. & i dr suppe schwümmt es haar. ▷ die herre vasella & brady dougan kassiere a eim gwöhnleche morge, was du i zäh jahr.



# PATENT OCHSNER

FINITOLAVORO – THE RIMINI FLASHDOWN, PART III<sup>2015</sup>

## HERR FLÜHMANN

[Huber]

über ihn macht me sech gärn e chly luschtig. sie meine, är heig nümm aui tassen im schrank & sie schmunzle, we sie mit ihm rede. oder brüele. aber mit sym näie hörgrätli ghört är so guet wie aues – wenn är wott. « jede morge nach em uufschtah hockt är häre, i dä sässu, wo so aut isch win är, zündet sech sis zmorge a & weidet d tageszytig uus. « churz vor mittag chunnt d schwigertochter, wo ganz i dr nächi wohnt, & wärmt ihm d räschte vom vortag oder chochet ihm e büttelisuppe. är luegt nid uf gueti tischmaniere, wenn är issst. äs hocket säute öpper binim, wos chönnnt störe, dass er schlürflet u schmatzet. ds alleini ässe stört ne länger scho nümm, är gniessts sogar & nennts "dr zwöit fröhlig mit de dritte zäng". « so gseht e tag us bim herr flühme. öb d sunne schynt, öbs Schiffet oder schneit. es weiss es niemer e so guet wie dr herr flühme, dass d zyt schpringt, aber glych nid vergeit. « när gönnnt är sech en incaromkafi, won är mängisch mit eme schüssli kirsch verfiineret, lost "rendez-vous am mittag" us äm transischerradio & macht es chlyses mittagsschläfli. « am namittag sträut är die paar dünn, wysse häärli, wonim no si blybe, vom lingge zum rächten ohr, schwümmt es paar längine im pitralon & macht sech uuf, d wäut gah z erobere, winer so schön seit. vier oder füüf stazione mit em tram bis a ds änd vor schstadt & när wieder zrügg. däm seit är uusflug. « so gseht e tag us bim herr flühme. öb d sunne schynt, öbs Schiffet oder schneit. es weiss es niemer e so guet wie dr herr flühme, dass d zyt schpringt, aber glych nid vergeit. « jede aabe hockter häre i dä sässu, wo so aut isch win är, zündet sech sys znacht a. är suecht im amtsblatt i de todesaazeige nach bekannte näme. aber das chunnt nume no säute vor. när schpüelt är syni bluetdrucktablette mit eme glesli rote abe, nimmt es blofi & schribt en einzige satz uf e wandkaländer, wonim e versicherigsgsellschaft het gschankt: "wed nid wosch, dass d miuch sur wird, de lasch se gschider i dr chueh." « so gseht e tag us bim herr flühme. öb d sunne schynt, öbs Schiffet oder schneit. es weiss es niemer e so guet wie dr herr flühme, dass d zyt schpringt, aber glych nid vergeit.

## AUSKLAAR

[Huber]

sie & I, mir zwöi, gäge räsch vo dr wäut nähme mirs no lengschtens uuf. härzliebschi, gib gas & entfüehr mi nomau, we dr summer wieder chunnt. wok wok. lele wok. alele wok oma. alele wok oma lele. ausklaar!? meh oder minger. dr wind wäit usnahmswys mau vo hinger. aues verlore & aues wieder gwunne. sie & I & dr ganz tag sunne. « mir hei chaut gha wie d söl & mir hei vögu übercho. dr winter isch e marathonlouf. so lang us autem bode aber ging no näis grüen wachst, nimi no mängs, wo chunnt, i chouf. wok wok. lele wok. alele wok oma. alele wok oma lele. ausklaar!? meh oder minger. dr wind wäit usnahmswys mau vo hinger. aues verlore & aues wieder gwunne. sie & I & dr ganz tag sunne.

## EPILOG

[Huber]

chumm, trink uus! das isch ds änd vo dr gschicht. & wünsch dir d brosme vom muul. lue, dert isch d tür & hingedran, dert fingsch du aues, wo dir hie fäut. fahr los! chumm, fahr los! & lueg gschider gar nümm zrügg. dä sumpf isch nüt für ne blueme wie di. chumm, mir lösche ds liecht! « ha di scho lang, lang, lang us den ouge verlore. ha viu z tue gha mit mir. verwirrt & verpeilt im labyrinth. mit dr dunkle brüue i dr dunkle nacht. fahr los! chumm, fahr los! & lueg gschider gar nümm zrügg. ds ganz grosse glück fingsch angerswo. chumm, mir lösche ds liecht!

## FINITOLAVORO

[Huber, Zwiauer]

senoras y senores, queridos ninos, en esto habemos llegado al fin. no sabemos lo que nos depara el futuro. tenemos que aguantar con la incertidumbre. lo que nos consuela es de saber que no estamos los unicos en esta situacion. nos depedimos y esperamos que ustedes sigan apoyandonos. tengan cuidado y no se dejen avasallar! nunca!

